



## INFORMASHON

*Fecha*  
29 di ougùstùs 2017

*Accountmanager di Komunikashon*  
Jhanirha Da Costa Gomez

*Email*  
[jhanirha.anita@gobiernu.cw](mailto:jhanirha.anita@gobiernu.cw)

### **Roi i transporte di awa di áwaseru**

Na Kòrsou nos konosé periodonan di áwaseru i tambe áwaseru ku ta kai di un forma inesperá. Na momentu ku áwaseru kai, e awa ku ta bin di shelu aki mester keda transportá na un manera efisiente pa evitá ku e awa ta kousa inundashon òf keda para riba kaminda. Pa logra esaki, nos pais tin un infrastruktura/sistema di roi pa transporte di e awa di áwaseru.

Un roi ta un konstrukshon di betòn, asfalt òf tera ku ta kanalisá awa i hiba esaki sea na un dam òf na laman. Un dam ta un konstrukshon ku ta fangu e awa i despues ta permití e awa aki sak den tera. Roinan por ta kantu di kaminda, den bario òf den áreanan no habitá. Damnan tambe ta situá na diferente kaminda.

Servisio pa Obra Públiko (OW) tin e tarea pa traha i mantené e sistemanan di roi i damnan rònt Kòrsou. OW ta hasi esaki regularmente i konstantemente ta buskando maneranan pa mehorá e sistemanan aki. Tin diferente téknikanan pa traha roi i dam pa asina nan por funshoná optimalmente.

### **Limpiesa di roi i/òf dam**

OW ta sòru di limpia tur roi na Kòrsou periódikamente. Den mayoria kaso, e roinan ta yena ku sushi ku hende mes ta laga atras. E roi por ta yena tambe ku tera òf matanan ku e awa di áwaseru a laba bin kuné.

Kualke persona ku tuma nota di un roi ku ta sushi òf yena, por tuma kontakto ku OW na 434-4237 òf via di email [info.vvvp@gobiernu.cw](mailto:info.vvvp@gobiernu.cw). OW lo analisá e situashon i plania pa limpia esaki mas pronto ku ta posibel. Meskos ta konta pa damnan tambe.

### **Konstrukshon di roi i/òf dam**

Na momentu ku ta bai desaroyá un área pa bibienda òf pa industria, OW ta analisá e situashon i traha e plan huntú ku otro servisionan di Gobièrnu. Di e forma aki, nan ta plania e infrastruktura rondó di e área. Esaki lo por inkluí un sistema di roi pa kanalisá awa di áwaseru.